



JULING JELING

HARI perkahwinan akan tiba dalam masa beberapa purnama. Aku sudah bersedia. Kursus kahwin sudah selesai diikuti. Barang hantaran rasanya tak perlu aku sediakan terlalu awal. Arman janji pernikahan ini akan dijalankan dengan cara mudah tapi meriah. Tidak mahu menyusahkan ramai orang.

Tidak pernah terlintas untuk menjadikan hari pernikahan kami itu sesuatu yang luar biasa atau *grand*. Apa lagi untuk dinobatkan sebagai *wedding of the year*. Siapalah aku dan pasanganku. Bukan barisan artis atau selebriti popular tanah air.

Tiada siapa pun yang menaja pakaian dan kelengkapan persandingan kami. Tiada dua majlis diadakan untuk pernikahan dan resepsi. Cukup dengan nikah dan kenduri sekali gus. Mudah dan tidak memeningkan kepala keluarga.

Tunanganku juga seorang yang sangat *simple*, sekepala denganku. Aku tak perlu banyak membuang waktu untuk meninjau-ninjau persalinan pengantin di mana-mana butik perkahwinan. Akau berbincang berlama-lama dengan agensi perkawinan atau *wedding planner* yang memang sentiasa menawarkan harga istimewa yang sengaja 'mengena'. Tak perlu.

Bagi Arman, dia lebih suka menyimpan wang untuk masa depan kami. Sebagai kakitangan kerajaan yang berpendapatan sederhana, perancangan kewangan amat kami utamakan.

Kami lebih bersedia untuk membeli keperluan rumah daripada berhabisan untuk kenduri. Aku sangat setuju. Alhamdulillah, Allah temukan jodohku tatkala hampir bersedia dari segi kewangan. Cuma satu perkara yang masih menghantui fikiranku yang membuatkan aku buntu memikirkannya. Tapi aku nekad untuk meneruskan.

Daripada aku berhabis duit untuk persediaan perkahwinan, lebih baiklah aku beri tumpuan kepada sesuatu yang kurasakan lebih bermakna. Walaupun ianya telah sekian lama menjadi identiti dan personalitiku, namun masa masih belum terlewat. Itu yang aku diberitahu oleh seorang doktor ketika membuat rawatan dahulu.

“Masih boleh cuba untuk dibetulkan keadaan cik ini,” ulas Doktor Saf usai memeriksa keadaan mata kiriku. Hatiku berbunga juga dengan komen positif daripadanya. Sekurang-kurangnya harapan untuk aku kembali seperti orang lain masih tetap ada.

Meskipun Arman seakan cuak untuk menyokong. Aku ingin hari bahagia itu menjadi detik sejarah terindah dalam hidupku meskipun ia majlis yang *simple*, tapi ia mesti *perfect*. Aku masih ada sembilan bulan untuk menjadikan hari bahagia itu sempurna.

Kesungguhanku itu kusandakan kepada kebarangkalian untuk kembali normal adalah tinggi. Namun ada faktor-faktor penyumbang lain yang mungkin menjadi penghalang kejayaannya. Itu yang aku pula sedikit risau.

Rasa serba-salah dan ketidakpastian masih juga menghuni ruang hatiku. Namun demi keluarga dan masa depanku, tekad bulat kukuatkan. Lagipun niatku ikhlas, untuk suamiku, bukan untuk melawa atau menunjuk-nunjuk.

SEJARAH SILAM

“LIA nak lakukan pembedahan itu sebelum naik pelamin, sayang,” kataku separa merayu. Arman membisu tetapi tidak membantah. Memang dia tidak pernah ungkit fasal kondisi matakku yang sebelah itu. Malah tidak pernah merasakan kekuranganpun. Cuma aku yang beriya sangat.